


POUR UNE SUISSE VRAIMENT PLURILINGUE
FÜR EINE WIRKLICH MEHRSPRACHIGE SCHWEIZ
PER UNA SVIZZERA VERAMENTE PLURILINGUE
PER INA SVIZRA VAIRAMAIN PLURILINGUA

Symposium national
Nationales Symposium
Simposio nazionale
Simposi naziunal

27.8.
2026
Bern



COMMUNICAZIUN A LAS MEDIAS ED INVIT A LAS MEDIAS

Per ina Svizra vairamain plurilingua: ils principals acturs dal pajais sa reuneschan ils 27 d'avust a Berna

Biel/Berna, ils 20 d'avust 2026 – Co pudain nus rinforzar a moda duraivla la plurilinguitad en Svizra? Co pudain nus preservar quai che furma ina da las pli grondas ritgezzas dal pajais e responder a medem temp a las sfidas da l'intelligenza artificiaza, da l'evoluziun da las medias, da la scola, da l'economia e da la coesiun naziunala?

A questas dumondas emprova da responder il Simposi naziunal «Per ina Svizra vairamain plurilingua», organisà gievgia, ils 27 d'avust 2026, a la Scola auta spezialisada bernaia (BFH) a Berna, a chaschun dals 30 onns dal Forum per la bilinguitad. La manifestaziun vegn sustegnida da l'Uffizi federal da cultura (UFC) ed è organisada en stretga collavuraziun cun l'associaziun Forum Helveticum sco er cun numerus partenaris engaschads per la plurilinguitad.

Sut il motto «In'iarta da preservar. Ina responsabladad da purtar ensemen. In avegnir da construir.», reunescha questa jornada ils principals acturs da la plurilinguitad svizra per metter las basas d'in Manifest per ina Svizra vairamain plurilingua.

In process participativ nov

Il Simposi na sarà betg ina conferenza academica classica. El è vegnì concepì sco in veritabel laboratori d'ideas che reunescha represchentantas e represchentants da la Confederaziun, dals chantuns, da las scolas autas, da las medias, da l'economia, da la societad civila e da la giuventetgna. La finamira è clera: ir pli lunsch che las constataziuns e sviluppar ensemen recumandaziuns concretas per rinforzar la coesiun naziunala tras las linguas. Las propostas che resultan da la jornada servan sco basa per redactar in Manifest che vegn preschentà durant l'onn 2027.

Il Simposi ha lieu en in context spezialmain actual. Entant che plirs chantuns da la Svizra tudestga mettan en dumonda l'instrucziun tempriva dal franzos, ha la Confederaziun mess en consultaziun ina revisiun da la Lescha da linguas per rinforzar la posiziun da las linguas naziunalas en la scola obligatoria. Questa revisiun regorda che las linguas naziunalas èn in pilaster essenzial da la coesiun dal pajais e che la Confederaziun ed ils chantuns han la responsabladad cuminaivla da promover la chapientscha ed ils barats tranter las cuminanze linguisticas. Las reflexiuns a Berna vegnan uschia ad alimentar in debat che va lunsch sur il rom da la scola ora e pertutga l'avegnir da la convivenza en Svizra.

Intelligenza artificiziala, medias, scola, economia...

La damaun cumenza cun duas conferenzas ed ina maisa radunda davart las grondas sfidas da la plurilinguitad en Svizra.

La professuressa Sophie Othman (Université Marie et Louis Pasteur Besançon) avra las discussiuns cun ina conferenza davart las sfidas e las schanzas che l'intelligenza artificiziala porscha per emprender linguas.

La directura generala da la SSR, Susanne Wille, discorra suenter davart la rolla da las medias da service public per promover la plurilinguitad e la convivenza en Svizra.

En quest context è l'emprima maisa radunda deditgada ad ina dumonda ch'è actualmain al center dal debat politic svizzer: «L'instrucziun tempriva da las linguas naziunalas: surchargia per la scola u ciment da la Svizra?». Ella reunescha represchentantas e represchentants da la politica, da la perscrutaziun e da l'instrucziun per confruntar lur visiuns da l'avegnir.

Otg lavuratori per construir soluziuns

Il suentermezdi dat bler spazi a la participaziun. Las participantas ed ils participants pon prender part a dus da las otg lavuratori tematics, tranter auter davart l'instrucziun da linguas, las politicas linguisticas chantunalas, l'integrasiun, il mund da lavur, ils dialects, las medias, la giuventetgna e las relaziuns tranter interpresas pitschnas e mesaunas e plurilinguitad. Ils resultats dals lavuratori vegnan discutads en plenari per definir recumandaziuns cuminaivlas che vegnan a nutrir il futur Manifest per ina Svizra vairamain plurilingua.

Persunalitads da prim rang

A la jornada participeschan tranter auter:

- Elisabeth Baume-Schneider, cussegliera federala;
- Carine Bachmann, directura da l'Uffizi federal da cultura;
- Susanne Wille, directura generala da la SSR;
- Christophe Darbellay, president da la CDEP;
- Martin Candinas, cusseglier naziunal;
- Christian Levrat, president da Forum Helveticum e president dal cussegl d'administrasiun da La Posta;
- numerusas represchentantas e numerus represchentants dals chantuns, da las scolas autas, da las medias, da las interpresas e da la societad civila.

In anniversari orientà vers l'avegnir

Fundà il 1996, festivescha il Forum per la bilinguitad quest onn ses 30 onns. Quest Simposi è in dals puncts culminants da l'anniversari. El marchescha surtut il cumenzament d'ina dinamica naziunala che vul far da la plurilinguitad betg mo in'ierta da preservar, mabain er in project collectiv per l'avegnir.

In project purtà d'ina vasta rait naziunala

Il Simposi vegn organisà dal Forum per la bilinguitad, cun il sustegn da l'Uffizi federal da cultura (UFC) ed en stretga collavuraziun cun Forum Helveticum.

El profita er dal partenadi cun plirs acturs impurtants da la promoziun da la plurilinguitad en Svizra:

- Institut da plurilinguitad (Universitad da Friburg / Scola auta pedagogica da Friburg)

- Helvetia Latina
- Movetia
- Regiun da la chapitala svizra
- BERNbilingue

Questa collavuraziun mussa la voluntad cuminaivla dals circuls politics, scientifics, instituziunals ed economics da far da la plurilinguitad in veritabel project d'avegnir per la Svizra.

INFURMAZIUNS PRACTICAS

Simposi naziunal per ils 30 onns dal Forum per la bilinguitad: Per ina Svizra vairamain plurilingua

Data: gievgia, ils 27 d'avust 2026

Lieu: Scola auta spezialisada bernaia – Economia (BFH), Brückenstrasse 73, 3005 Berna

Uras: 9.30–17.30

INTERVISTAS

Las referentas ed ils referents sco er numerosas expertas e numerus experts dals champs politics, scientifics e da las medias stattan a disposiziun per intervistas. Discurs individuals pon vegnir organisads sin dumonda.

Per motivs organisatorics As supplitgain nus da Vus annunziar sut la suandanta adressa: info@comcoeur.ch

CONTACT PER LAS MEDIAS

Virginie Borel

Directura dal Forum per la bilinguitad

Tel.: 078 661 89 75

E-mail: virginie.borel@bilinguisme.ch